

P. VERGILI MARONIS

- hic uiridis tenera praetexit harundine ripas  
Mincius, eque sacra resonant examina quercu.  
quid facerem? neque ego Alcippen nec Phyllida habebam  
depulsos a lacte domi quae clauderet agnos, 15  
et certamen erat, Corydon cum Thyrside, magnum;  
posthabui tamen illorum mea seria ludo.  
alternis igitur contendere uersibus ambo  
coepere, alternos Musae meminisse uolebant.  
hos Corydon, illos referebat in ordine Thyrsis. 20
- C. Nymphae noster amor Libethrides, aut mihi carmen,  
quale meo Codro, concedite (proxima Phoebi  
uersibus ille facit) aut, si non possumus omnes,  
hic arguta sacra pendebit fistula pinu.
- T. Pastores, hedera crescentem ornate poetam, 25  
Arcades, inuidia rumpantur ut ilia Codro;  
aut, si ultra placitum laudarit, baccare frontem  
cingite, ne uati noceat mala lingua futuro.
- C. Saetosi caput hoc apri tibi, Delia, paruus  
et ramosa Micon uiuacis cornua cerui. 30  
si proprium hoc fuerit, leui de marmore tota  
puniceo stabis suras euincta coturno.
- T. Sinum lactis et haec te liba, Priape, quotannis  
exspectare sat est: custos es pauperis horti.  
nunc te marmoreum pro tempore fecimus; at tu, 35  
si fetura gregem suppleuerit, aureus esto.
- C. Nerine Galatea, thymo mihi dulcior Hyblae,  
candidior cycnis, hedera formosior alba,  
cum primum pasti repetent praesepia tauri,  
si qua tui Corydonis habet te cura, uenito. 40
- T. Immo ego Sardoniis uidear tibi amarior herbis,  
horridior rusco, proiecta uilior alga,  
si mihi non haec lux toto iam longior anno est.